

Geistlicher Baustein Nr. 9

- Selige Gewissheit -

Albanische Übersetzung:

Guri i ndertimit Frymor Nr. 9

- SIGURIA E BEKUAR -

1 Gjonit 5:13: “Jua kam shkruar këto juve që besoni në emrin e Birit të Perëndisë, që të dini se keni jetë të përjetshme dhe që të vazhdoni të besoni në emrin e Birit të Perëndisë.”

Dëshmia e Frymes së Shenjtë është kur ti mund ta pranosh Fjalën; jo një sistem, por të kesh një kuptim të qartë.

Si mund ta dish nëse e ke kuptuar qartë Fjalën? Vëreje atë — ai e dëshmon vetveten. “Mirë,” thua ti, “e shoh që bën këtë dhe atë.” Po, edhe barërat e këqija jetojnë në të njëjtën mënyrë, por duhet të jetë e gjithë Fjala. Që të jesh Nusja, duhet të jesh pjesë e Tij, dhe Ai është Fjala. Cila pjesë e Fjalës së Tij? Fjala që është premtuar për këtë ditë, në kohën kur Ai po thërret Nusen e Tij — prej asaj fjale je pjesë ti! E kuptuat? Mos e humbni këtë. [1]

A ka dikush këtu që ende nuk e ka marrë pagëzimin në Fryme? Ju thoni: “Po unë kam brohoritur dikur.” Shumë mirë. “Kam folur në gjuhë.” Edhe kjo është shumë mirë. Por megjithatë, kjo nuk është ajo që dua të them. Si mund të brohorasësh dhe të flasësh në gjuhë dhe pastaj të mohosh Fjalën? Dëshmia e Frymes së Shenjtë është të besosh Fjalën e Tij. Kështu ka qenë gjithmonë në çdo epokë: kur ti mund ta pranosh Fjalën. Këta priftërinj do ta kishin rrahur Jezusin për miliona kilometra kur bëhej fjalë për frytet e Frymes. Ata ishin të sjellshëm, paqësorë, të butë, të përlur. Jezusi i përmbysi kishat, i përmbysi tryezat, trazoi njerëzit dhe i quajti ata “gjarpërinj nën bar” dhe shumë të tjera (Mat. 21:12-13; Mat. 23:29-34). Shihni, megjithatë Ai ishte kjo Fjalë. Ai ishte kjo Fjalë. Kjo është: besoji Perëndisë! Perëndia është Fjala. Besoje! [2] Nëse je farë e vërtetë, do ta dëgjosh Fjalën (Gjoni 8:47). Fryma do të të pagëzojë në trupin e Krishtit (1 Kor. 12:13), do të të mbushë dhe do të të veshë me fuqi, dhe ti do ta pranosh Fjalën për ditën dhe epokën tënde. E shihni sa i qartë bëhet dëshmia e vërtetë kur Fjala të është zbuluar? Kini serish vëmendje, Jezusi ishte fara Mbretërore.

Ai jetoi në një trup njerëzor. Kur Fryma e thirri Atë (mendimi i shprehur nga Fjala), Ai shkoi në Jordan dhe u pagëzua atje në ujë (Gjoni 1:29-34).

Sepse iu bind Fjalës, Fryma e Shenjtë erdhi mbi Të dhe një zë tha: "Ky është Biri Im i dashur, dëgjoni Atë!" Zëri nuk tha: "Ky u bë Biri Im", Jezusi ishte Biri. Fryma e Shenjtë e shpalli Atë si këtë Bir, përpara të gjithëve.

Pastaj, i mbushur kështu (dhe sipas të njëjtit model ndodhi edhe në Ditën e Rrëshajëve dhe që atëherë vazhdimisht), Ai shkoi në fuqi demonstrative, mori zbulesën e plotë të Perëndisë dhe nga Perëndia për atë ditë.

Tani, ne gjithmonë kemi thënë që prova e vërtetë që një besimtar është i mbushur me Frymen e Shenjtë është pranimi i Fjalës për epokën në të cilën jeton.(3)

Prova e një të krishteri të mbushur me Frym nuk është që ai vetë të nxjerrë të vërtetën (Fjalën), por që ta pranojë të vërtetën (Fjalën), ta besojë dhe t'i bindet asaj (Veprat 5:32).(4)

Gjithçka varet nga ajo se ku është Fjala e Tij. Moisiu kishte Fjalën, Faraoni kishte shtiza. Moisiu kishte Fjalën. E vetmja gjë që i duhej, ishte Fjala. Edhe ty sot kjo të duhet. Nuk të nevojitet ndonjë rekomandim nga ndonjë kishë. Nuk të duhet ndonjë denominacion që të mbështet. Të duhet Fjala, për të përjetuar Rrëmbimin. Nuk të duhet ndonjë dokument zyrtar. Nuk të duhet ndonjë histori e gjatë nga ndonjë shkollë, për t'u shëruar sot. Vetëm prano Fjalën – ajo e bën efektin e saj.

Nuk të duhet fjala e mjekut. Nëse mjeku thotë se ka bërë gjithçka që ka mundur, atëherë ai vërtet ka bërë gjithçka që ka mundur. Nëse ai thotë se ke kancer, një tumor, se do të verbohesh, do të shurdhohesh, apo çfarëdo tjetër qoftë, kjo nuk ka rëndësi. Nëse mund ta çosh këtë Fjalë te ai premtim i ferrës së ndezur, diçka do të ndodhë! Perëndia do ta provojë Fjalën e Tij çdo herë, nëse pranohet mbi bazën e duhur.

Kjo është ajo që të duhet: Fjala e Tij. Ai e provon, Ai e mban. Mund të pushosh i sigurt se është e vërtetë.(5)

Unë kam shkuar në disa kisha, ku ditën e parë që shkon atje, vijnë tek ti dhe thonë: "Bëhu anëtar i kishës sonë. Nëse jo, nuk je i mirëpritur." E shihni? Është diçka e imponuar. Të imponohet, dhe kjo është Babilonia.

Por në Krishtin, ti hyn përmes perzgjedhjes, jo me detyrim – zemra jote tërhiqet vetë drejt Tij.

Pali tha atje: “Ne që dikur”, pra në një kohë tjetër nga tani, “ishim të vdekur në mëkate dhe shkelje, Perëndia na bëri të gjallë, na solli në jetë.” (Efesianëve 2:1-7). Tani shikoni: përpara se diçka të bëhet e gjallë, duhet të ekzistojë diçka që mund të bëhet e gjallë. Kjo është e vërtetë.

Pra, kuptoni se nëse ju ishit në paranjohjen e Perëndisë (Romakëve 8:28-30), atëherë jeni bërë pjesë e Perëndisë. Mënyra e vetme për të qenë një bir apo bijë e Perëndisë është të jesh pjesë e Perëndisë. Dhe pa ju, Perëndia nuk është i plotë (Mateu 13:37-39; Luka 8:11). Kështu duhet të jetë, sepse ekziston vetëm një burim i jetës së përjetshme – dhe ai është Perëndia (Psalmi 36:10) – dhe vetëm Ai ka jetë të përjetshme. Ju ishit pjesë e Tij, një cilësi e Tij, që nga fillimi në mendjen e Tij. Dhe sepse Ai ka menduar për ju që nga fillimi, prandaj e ndieni këtë tërheqje drejt Tij. Kjo është ajo që duhet të bëhet e gjallë. Disa kurrë nuk do të bëhen të gjallë – ata thjesht nuk e kanë atë, kaq është kjo.

Është njësoj sikur të mbjellësh një kokërr në tokë. Sado e bukur të duket, nëse nuk ka farën e jetës brenda saj, ajo nuk mund të bëhet e gjallë. Farën e jetës duhet ta ketë që në fillim.

Derisa ti po mendon për këtë tani, thjesht lutu dhe thuaj, është në zemrën tënde. Shikon, nëse ndien një tërheqje, një ndjesi që të ngacmon në zemër, kjo është ajo. Është ajo cilësi brenda teje që po përpiket të dalë në pah.⁽¹⁾

Nuk ka rëndësi sa thellë je në mëkat, çfarë ke bërë – kjo nuk ka aspak lidhje. Vëre Shenjën! (Eksodi 12:13). Ajo është për ty. Nëse ndien në zemrën tënde se ka diçka që të tërheq, atëherë është për ty. Vëre Shenjën!

Një i krishterë i vërtetë do të përputhet me njeriun e tij të brendshëm – me atë frymë që ka qenë aty që në fillim – që është Fjala. Ashtu siç Ai është plotësia e të gjithëve ju (Kolodianëve 2:9-15), po ashtu edhe ti ke qenë që atëherë në të, në Golgotë (Romakëve 6:6).

Ai e dinte më parë që ti do të ishe këtu. Ai thjesht shpalli atë që do të ndodhte. Dhe ti ishe në Të – ke vdekur bashkë me Të.

Ti i ke vdekur krenarisë tënde, i ke vdekur pasionit tënd, i ke vdekur botës. Ti ke vdekur bashkë me Të në Golgotë dhe je ringjallur me Të, kur Ai u ringjall ditën e tretë. Dhe sepse e ke pranuar Atë, tani je ulur në vendet qiellore në Krishtin Jezus (Efesianëve 2:4-7). Haleluja!

Ja ku e keni. Bëhet fjalë për njeriun e brendshëm! Ky i brendshmi, që e konfirmon çdo fjalë, që kapet fort pas Fjalës, pavarësisht rrethanave. Ti nuk ke ndonjë merite për këtë. Unë e kam mësuar këtë para shumë vitesh.(9)

Nëse dëshiron të përjetosh provën e Frymës së Shenjtë, ja ku është: Kur shpirti yt përputhet plotësisht me Fjalën e Perëndisë, kjo tregon se ke kaluar jetën tënde nëpër filtrin e Perëndisë.

Kjo tregon se thellë në ty ka qenë fara e perzgjedhur, e cila të bëri të kesh uri për Perëndinë (Mateu 5:6). “Të gjithë ata që më ka dhënë Ati, për t’i shpëtuar, vdiqën me Mua në Golgotë; ata u ringjallën me Mua në ringjallje; të gjithë ata që Ai më ka dhënë do të vijnë tek Unë” (Gjoni 6:37-39). Ata do të përfshihen në trup (1 Korintasve 12:12-14), qoftë si këmbë, krah, hundë, gojë apo çfarëdo tjetër. Ata do të përfshihen dhe do të vijnë tek Unë në kohën e tyre.”(10) Djalli do të të godasë; do të të thotë çdo gjë të mundshme, do të të akuzojë dhe do të përpiqet të të bëjë të mendosh se nuk je i Tij. Por mos e dëgjo ate!

Ti e di se ke kaluar nga vdekja në jetë (Gjoni 5:24; 1 Gjoni 3:14). Ti e di që nuk i do më ato gjëra që dikur i doje. Ti e di që beson çdo fjalë të Perëndisë, ke parë Perëndinë duke vepruar në mesin tonë.(11)

Besimtarët e këtij brezi duhet të besojnë atë që Ai ka premtuar për sot. Ashtu siç duhej të hynin në arkë për të shpëtuar (1 Pjetri 3:20-22), siç duhej të dilnin nga Egjipti për të shpëtuar, ashtu edhe sot duhet të hyjnë në Krishtin për të shpëtuar, të hyjnë në mesazhin e Fjalës, që Ai është i njëjti dje, sot dhe përjetë.

Si hyhet aty? Me anë të pagëzimit! Pagëzim me çfarë? Me ujë? Me anë të Frymës së Shenjtë! “Sepse në një Frymë të vetme, të gjithë u pagëzuam për të qenë një trup.” (1 Korintasve 12:13; Efesianëve 4:4-6).

Ai veptoi në këtë epokë ashtu siç veptoi në të gjitha epokat dhe ashtu siç do të veptojë, ashtu siç ka premtuar të veptojë. Perendia premtonte gjithçka, pastaj Ai zbret dhe e vërteton Fjalën e Tij, që ajo është e vërtetë. Të gjithë ata që besojnë, të gjithë ata që besojnë mesazhin e kësaj epoke, hyjnë dhe shpëtohen. Ashtu do të ndodhë në çdo epokë. Të gjithë ata që nuk e besojnë mesazhin dhe lajmëtarin, do të humbasin.

Dhe të gjithë ata që me të vërtetë e besojnë Fjalën e Perëndisë sot, do të nxirren jashtë (nga kjo botë). Të gjithë ata që nuk e besojnë Fjalën e Perëndisë, do të humbasin me botën, sepse janë nga bota, dhe gjithçka që është në botë duhet të humbasë me botën (Marku 16:16). Dhe gjithçka që është e shpëtuar në Perëndinë, duhet të jetë në Perëndinë dhe nuk mund të humbasë. “Unë do t’u jap atyre jetë të përjetshme dhe do t’i ringjall në ditën e fundit.” Tani, çfarë ngushëllimi për çdo besimtar është të dijë se nëse je në Krishtin, Perendia, po aq i sigurt sa që e mban Fjalën e Tij dhe bota humbet, po aq i sigurt është që Ai do ta mbajë Fjalën e Tij dhe do ta ringjallë popullin e Tij dhe do t’i shpëtojë ata. Ai e vërteton këtë.(5)

Tani, nuk është ndonjë provë e caktuar. E shihni? Ju thoni: “Vëlla Branham”, e ndiej këtë në mendimet tuaja, “si do ta njoh këtë?”

Shiko, çfarë ishte ti dhe çfarë je tani? Kështu mund ta dish, e sheh? Çfarë ishte ti para se të vendosej ky shenjzim? (Eksodi 12:13). Çfarë je ti pasi është vendosur? Cilat ishin dëshirat e tua më parë dhe cilat janë tani? Atëherë e dini nëse shenjzimi është vendosur apo jo. Dhe ato gjëra të tjera thjesht vijnë automatikisht bashkë me të.(13)

Izraeli në daljen e tij (nga Egjipti) është një shenjje ashtu siç është sot. Vëreni çfarë kishte Izraeli gjatë daljes së tij.

E para që kishin, për të bërë të qartë se ora kishte ardhur, ishte një profet me një mesazh. Moisiu zbriti me një mesazh. Fjala e Perëndisë ishte me Moisiun (Eksodi 19/20).

Pastaj Moisiu duhej të vërtetohej (të tregonte se ishte i dërguar). Dhe ai u vërtetua nga një shtyllë zjarri. Kjo vërtetoi veprën e tij, që Perendia e kishte dërguar atë. Dhe Moisiu kishte Fjalën e Perëndisë, madje edhe aftësinë për të krijuar gjëra dhe për t’i sjellë ato në tokë (Eksodi 34:27–35).

Dhe shenja që Perëndia ua kishte dhënë atyre, përmes gjakut, ishte siguria se, në kohën e vdekjes, Ai do të kalonte pranë tyre me mëshirë pa i dënuar (Eksodi 12).

E njëjta gjë ka ndodhur edhe sot, e njëjta çështje. Fjala e Perëndisë na është sjellë, shtylla e zjarrit është mes nesh dhe dëshmon se Jezusi Krishti është ringjallur prej së vdekurish, i njëjti dje, sot dhe përjetë; dhe siguria e pagëzimit me Frymen e Shenjtë në zemrat tona, që prodhon dashurinë tonë ndaj Perëndisë (Romakëve 5,3-5). Dalja (shpëtimi) është përsëri në zhvillim.

Asnjë djall, asnjë sëmundje, asnjë vuajtje, asgjë tjetër nuk mund të të shqetësojë, përderisa ti e mban këtë shenjë mbi vete. Amin. Besimi yt i pandryshueshëm rreh në të njëjtin ritëm dhe formon një figurë të Jezus Krishtit – figurën në të cilën ti po hyn sot > “Dhe kur ta shoh shenjën, do të kaloj përmbi ju.”

Është një shenjë, është një provë se çmimi është paguar. Jezusi e ka paguar çmimin dhe ti e ke marrë prej Tij. Duke e mbajtur shenjën në dorën tënde, ti ke sigurinë e ringjalljes. Ti ke sigurinë se gjithçka që të nevojitet në këtë udhëtim është përfshirë në këtë shenjë të vuajtjes së Tij në Golgotë. Aty Ai u përball me çdo mallkim që mund të vendosej mbi ty. Kjo shenjë flet për paqe. Amin.

Nuk ka djall që mund të qëndrojë përpara kësaj. Asgjë nuk mund të qëndrojë përpara kësaj, sepse Perëndia e ka pranuar atë.

Dhe ti mban në dorë shenjën që tregon se çmimi është paguar.

Oh, është një shenjë pozitive.(14)

Një motër i tha profetit të Perëndisë:

"Bëj kaq shumë gabime dhe dështoj shumë herë."

Ai iu përgjigj asaj:

Pikërisht për këtë arsye Krishti duhej të vdiste – që gabimet e tua të mos të llogariteshin.

Ai i mori gabimet tona.

Dëshira në zemrën tënde është t'i shërbesh Atij.

[Motra tha: "Po." Mirë. Prandaj Ai ka vdekur – që ti të mund t'i shërbeje Atij. Gabimet e tua nuk do të llogariten (Kolosianëve 2,13-15).

E sheh, Ai është pajtimi ynë. Ai është flijim për mëkatin tonë.

Mëkatet e tua nuk ekzistojnë më. Ti nuk je mëkatar përpara Perëndisë (Psalmi 32,1-2). Krishti i ka marrë mëkatet e tua dhe u bë ti, sepse dëshira jote është t'i shërbesh Atij (Hebrenjve 10,1-2).

[Motra tha: “Por unë nuk kam pasur kurrë një përvojë që të kem qenë e mbushur me Frymen e Shenjtë, një përvojë mbi të cilën mund të qëndroj me këmbë (të mbështetem).”]

Mirë. Vini re këtë: Zakonisht njeriu lind në mëkat, është formuar në padrejtësi, dhe del në këtë botë duke thënë gënjeshtër. Kjo është natyra e njeriut. Kjo ishte natyra jote (Romakëve 3:9-26). Por ajo u ndryshua menjëherë. Po çfarë e ndryshoi atë? ["Krishti."] Ja ku e ke, motër. E sheh, kjo është ajo . [15]

Qengji ishte atje pas perdes dhe po kryente shërbimin e ndërmjetësit, sepse po derdhte gjakun për popullin dhe ndërmjetësonte për ta, derisa të hynte shpirti i fundit që është shkruar në Librin e Jetës së Qengjit përpara themelimit të botës (Zbulesa 5; Zbulesa 13:8). Vetëm aq shumë do të jenë atje, dhe kjo është e gjitha. Të tjerët as që duan të hyjnë; nuk kanë asnjë dëshirë për të hyrë. [16]

Tani, a mund ta imagjinoni një nënë që lind një fëmijë dhe nuk e di? Do të duhej të ishte pa ndjenja që të mos e dinte. Po ashtu është e pamundur të marrësh Frymën e Shenjtë dhe të mos e dish. Diçka ndodh brenda teje. Shih, është diçka që të ndryshon. E gjithë qenia jote, e gjithë qenia jote Frymore ripërtërihet dhe ti bëhesh një krijesë e re në Krishtin, siç e quan Bibla, një krijesë e re në Krishtin (2 Korintasve 5:17; Galatasve 6:15). Ti e di këtë. [17]